

বাংলাদেশ

দেশে ইন্টারনেট ব্যবহারকারী বেড়েছে ২০ লাখ, বেড়েছে মুঠোফোন গ্রাহকও

নিজস্ব প্রতিবেদক ঢাকা



প্রতীকী ছবি

দেশে চলতি বছরের শুরু থেকে ইন্টারনেট ব্যবহারকারীর সংখ্যা বাড়ছে। বাংলাদেশ টেলিযোগাযোগ নিয়ন্ত্রণ কমিশনের (বিটিআরসি) হিসাবে, জানুয়ারি থেকে মার্চ পর্যন্ত ইন্টারনেট ব্যবহারকারীর সংখ্যা ২০ লাখ বেড়েছে। পাশাপাশি মুঠোফোন গ্রাহকের সংখ্যাও বেড়েছে ৩০ লাখের বেশি।

বিটিআরসির তথ্য বলছে, গত বছরের জুলাইয়ে দেশে ইন্টারনেট ব্যবহারকারীর সংখ্যা ছিল ১২ কোটি ৭৫ লাখের কিছু বেশি। এর পর থেকে তা কমতে শুরু করে। বিশেষ করে মুঠোফোনে ইন্টারনেটের গ্রাহক উল্লেখযোগ্যভাবে কমতে থাকে।

বিটিআরসির সর্বশেষ তথ্য বলছে, দেশে ইন্টারনেট গ্রাহক ১২ কোটি ৬১ লাখের বেশি। গত জানুয়ারি থেকে মার্চ পর্যন্ত গ্রাহক বেড়েছে ২০ লাখ। এর মধ্যে মুঠোফোনে ইন্টারনেট গ্রাহক ১১ কোটি ৪০ লাখের বেশি এবং ব্রডব্যান্ড ইন্টারনেটের গ্রাহক ১ কোটি ২০ লাখের বেশি।

দেশে গত তিন মাসে মুঠোফোনের গ্রাহকের সংখ্যাও বেড়েছে। এ সময় মুঠোফোনের গ্রাহক ৩০ লাখের বেশি বেড়ে দাঁড়িয়েছে ১৮ কোটি ৩৮ লাখ। এর মধ্যে গ্রামীণফোনের গ্রাহক ৮ কোটি ৩ লাখ, রবির ৫ কোটি ৫৫ লাখ, বাংলালিংকের ৪ কোটি ১৩ লাখ ও টেলিটকের ৬৬ লাখ। টেলিটক বাদে বাকি তিন অপারেটরেরই গ্রাহকের সংখ্যা বেড়েছে।

গত বছরের জুনে দেশে মুঠোফোন গ্রাহক ছিলেন ১৮ কোটি ৪৪ লাখ। সেবার মান নিয়ে প্রশ্ন তুলে বিটিআরসি ওই বছরের ২৯ জুন গ্রামীণফোনের সিম বিক্রির ওপর নিষেধাজ্ঞা জারি করে। এ নিষেধাজ্ঞার ফলে অপারেটরটির প্রতিদিন ৪০ হাজারের মতো সিম বিক্রি বন্ধ হয়ে যায়। এ ছাড়া তারা ৩৫ লাখের মতো গ্রাহক হারায়।

গ্রামীণফোনের সিম বিক্রির নিষেধাজ্ঞার ফলে সর্বমোট তাদের গ্রাহকের সংখ্যাও কমে যায়। চলতি বছরের ২ জানুয়ারি এ নিষেধাজ্ঞা তুলে নেওয়া হয়।



সম্পাদক ও প্রকাশক : মতিউর রহমান
স্বত্ব © ২০২৩ প্রথম আলো